

Proyecto Dreamers ta wordo conclui cu cifranan oficial

ORANJESTAD - Segun un relato di directora di Dimas Kathy Paskel-Ruiz, un total di 888 persona a muestra interes pa haya un permiso di estadia indefinido den cuadro di proyecto Dreamers.

Un total di 1025 formulario di registracion pa e proyecto Dreamers a keda entrega dentro di e termino cu a stipula pa e proyecto, pues prome cu 1 di juli 2017. Si desconta e formularionan di personanan cu a entrega mas cu un formulario pa cita (137), e saldo ta bira 888 persona cu a muestra interes pa bin na remarca pa e proyecto Dreamers. Sra. Paskel-Ruiz ta conclui e proyecto cu algun cifra di e estado di e proyecto te awor.

Segun relato di sra. Paskel-Ruiz, "Te na e momentonan aki tin un total di 583 aplicacion formalmente entrega na Dimas pa bin na remarca pa



un permiso indefinido bou di e proyecto Dreamers. Di e 583 peticionnan aki a honra un total di 349 peticion, a nenga un total di 21 peticion y tin un total di 213 cu ainda ta den tramite."

"Di e total cantidad di peticion te awor por constata cu 52% ta menor di 18 aña, 48% di e personanan ta entre 18-39 aña y tin dos caso di personanan cu ta riba 60 aña. Di e total di peticion registra te

awor 48% ta hende muhe y 52% ta hende homber."

E top 5 di e nacionalidadnan di personanan cu a aplica ta forma e total di 80% di e aplicacionnan. Cu 34% di peticionnan haci pa Colombiano, 16% pa Venezolano, 16% pa Dominicano, 7% pa Haitiano y 7% pa Jamaicano (7%).

Demas personanan cu a muestra interes pa e proyecto Dreamers, pero cu pa un



motibo of otro, finalmente a resulta di cay afo di e cuadro defini pa e proyecto Dreamers ta consisti di 10%. Y cu a constata esaki sea den un fase preliminar (screening administrativo) of sea nan a haya un negacion riba nan aplicacion.

Segun sra. Paskel-Ruiz, "Dimas lo procede pa invita e personanan pa individualmente suministra nan cu informacion relevante y tambe

guia encuan to di cual titulo di estadia temporario (regular) nan posiblemente lo por bay aplica pe considerando nan caso particular y pa haya un splicacion di e proceso y tambe tur e rekisitonan cu ta coresponde cu e producto ey."

Riba 20 di juli ultimo Bon Dia Aruba a publica un articulo unda par di pregunta a bin dilanti pa cu e procedura di e proyecto aki. E hecho cu e permiso aki lo verval automaticamente si un persona establece su mes afo di Aruba tabata un preocupacion.

Entre otro redaccion di Bon Dia kier a puntra si tin algun excepcion cu lo haci e posibel pa e personanan cu e permiso aki por bin bek Aruba sin mester renoba permiso despues di nan estudio.

A tuma contacto cu sra. Paskel-Ruiz pa por contesta e preguntanan aki, pero a nenga di duna comentario.